

**Kata kunci:  
Prinsip  
Syariat  
Sesuai  
Mudah  
Jumud**



**Majlis Ugama Islam Singapura**

**Khutbah Aidiladha**

**27 Mei 2026 / 10 Zulhijjah 1447H**

**Menelusuri Hikmah Dalam Pelaksanaan Ibadah**

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ

اللَّهُ أَكْبَرُ مَا تَقَرَّبَ الْعَبْدُ بِقُرْبَانٍ

اللَّهُ أَكْبَرُ مَا رَغِبَ الْعَابِدُونَ فِي الْغُفْرَانِ

اللَّهُ أَكْبَرُ مَا حَمِدَهُ الْإِنْسُ وَالْجَانُّ

اللَّهُ أَكْبَرُ مَا جَرَّتِ الْكَوَاكِبُ بِحُسْبَانٍ

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ

لَا إِلَهَ إِلَّا اللَّهُ وَاللَّهُ أَكْبَرُ، اللَّهُ أَكْبَرُ وَلِلَّهِ الْحَمْدُ

الْحَمْدُ لِلَّهِ الَّذِي خَصَّ بِالْحَجِّ ذَا الْحِجَّةِ، وَحَطَّ الذُّنُوبَ عَمَّنْ قَصَدَ فِيهِ

الْبَيْتَ الْحَرَامَ وَحَجَّهٗ، وَعَظَّمَ الْأَجْرَ لِمَنْ أَظْهَرَ فِيهِ التَّكْبِيرَ وَعَعَجَّهٗ، وَأَشْهَدُ

أَنَّ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ

الَّذِي كَسَاهُ مِنْ حُلَلِ النُّبُوَّةِ وَالْبَهْجَةِ، اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ  
وَعَلَى آلِهِ وَصَحْبِهِ مَا حَمَلَ سَحَابٌ مَاءً وَمَجَّةً.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ. قَالَ تَعَالَى: يَا أَيُّهَا الَّذِينَ آمَنُوا اتَّقُوا اللَّهَ  
حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

### **Muslimin Muslimat yang dirahmati Allah,**

Segala puji bagi Allah s.w.t. yang telah mengurniakan kepada kita nikmat iman dan Islam. Segala kesyukuran kita panjatkan ke hadrat Allah s.w.t. kerana dipertemukan dengan satu lagi hari kebesaran dalam agama, iaitu Aidiladha. Semoga ia menjadi pemangkin serta membantu kita mempertingkatkan ketakwaan kepada Allah, Tuhan sekalian alam.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ  
اللَّهُ أَكْبَرُ وَلِلَّهِ الْحَمْدُ

Baru semalam, jutaan umat Islam daripada seluruh dunia, termasuk jemaah Haji dari Singapura, berkumpul di Arafah bagi menunaikan rukun Islam yang kelima.

Dalam suasana seumpamanya pada tahun kesepuluh (10) Hijrah, Rasulullah s.a.w. menyampaikan khutbah Wada' di Arafah, lalu Allah berfirman, dalam Surah Al-Ma'idah ayat 3:

الْيَوْمَ أَكْمَلْتُ لَكُمْ دِينَكُمْ وَأَتَمَمْتُ عَلَيْكُمْ نِعْمَتِي وَرَضِيْتُ لَكُمْ الْإِسْلَامَ دِينًا

Yang bermaksud: *“Pada hari ini Aku telah sempurnakan bagi kamu agamamu, Aku telah cukupkan nikmat-Ku kepadamu, dan Aku meredai Islam sebagai agamamu.”*

Dengan penyempurnaan ibadat Haji sebagai rukun agama yang kelima, setelah mengucap dua kalimah syahadah, mendirikan solat fardhu lima waktu sehari, berpuasa di bulan Ramadan, dan menunaikan zakat, maka Allah menyampaikan perintahnya bahawa agama Islam telah disempurnakan buat umat Nabi-Nya, s.a.w.

Para ulama tafsir seperti Imam Al-Baydawi, Ibn ‘Āshūr dan Al-Shātibi, menjelaskan bahawa kesempurnaan Islam yang dimaksudkan adalah pada **prinsip-prinsip** umum (*kulliyāt*) dan asas-asas panduan yang membimbing manusia dalam segenap ruang kehidupan.

Islam datang bersamanya **prinsip**, nilai dan dasar-dasar agama yang menentukan apa yang halal dan apa yang haram, yang bersifat kekal sepanjang masa dan zaman. Inilah maksud firman Allah *“akmaltu lakum dīnakum”* – kesempurnaan yang memberi kehidupan kepada **syariat**, bukan kelesuan mahupun kejumudan. Kesempurnaan dalam bentuk prinsip-prinsip, nilai-nilai serta hukum-hukum asas, membolehkan umat Islam di mana sahaja mereka berada, pada bila-bila masa, untuk mencari huraian dan melayari kehidupan dengan penuh keyakinan.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ  
اللَّهُ أَكْبَرُ وَلِلَّهِ الْحَمْدُ

### **Hadirin dan Hadirat yang dikasihi sekalian,**

Di antara prinsip dan nilai ini juga, yang menjamin kelestarian dan keberkesanan ajaran Islam, adalah pada sifat rahmah dan **kemudahannya**. Ini kerana, Allah Maha Mengetahui akan keterbatasan, perubahan keadaan serta cabaran yang dihadapi oleh hamba-Nya sepanjang zaman. Oleh itu, **syariat** tidak diperkenalkan untuk menyukarkan manusia, tetapi untuk membimbing mereka mendekati Allah s.w.t. dengan penuh hikmah, keseimbangan dan **kemudahan**.

Allah s.w.t. mengingatkan kita dalam Surah al-Haj ayat 78:

هُوَ أَجْتَبَكُمْ وَمَا جَعَلَ عَلَيْكُمْ فِي الدِّينِ مِنْ حَرَجٍ

Yang bermaksud: *“Dia telah memilih kamu, dan Dia tidak menjadikan ke atas kamu dalam agama ini sebarang kesempitan.”*

Dan firman-Nya dalam Surah al-Baqarah ayat 185:

يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ الْعُسْرَ

Yang bermaksud: *“Allah menghendaki **kemudahan** bagi kamu dan tidak menghendaki kesukaran ke atas kamu.”*

Nabi Muhammad s.a.w. juga bersabda:

إِنَّ هَذَا الدِّينَ يُسْرٌ، وَلَنْ يُشَادَّ الدِّينَ أَحَدٌ إِلَّا غَلَبَهُ.

Yang bermaksud: “*Sesungguhnya agama ini bersifat mudah, dan tidaklah seseorang mempersulitkan agama melainkan dia akan ditewaskan olehnya.*” (Riwayat An-Nasa’i)

Dalam hadis yang lain, dijelaskan bahawa apabila Rasulullah s.a.w. diberi dua pilihan, Baginda akan sentiasa memilih yang lebih **mudah** selagi ia tidak membawa kepada dosa. (Riwayat Al-Bukhari dan Muslim)

### **Sidang jemaah sekalian,**

Ini yang dapat kita lihat dalam ibadah haji juga. Ibadat yang melibatkan jutaan umat manusia, yang mengambil tempoh masa yang panjang, dalam keadaan dan cuaca yang amat mencabar. Adakah agama sengaja membiarkan umatnya menghadapi kesukaran dan kepayahan, atas dasar semuanya adalah ujian dan cabaran kehidupan?

Nabi s.a.w. sendiri pernah menjelaskan kepada para sahabat ketika menghadapi kesukaran dalam melaksanakan manasik haji:

افْعَلْ وَلَا حَرَجَ

Yang bermaksud: *“Lakukanlah sahaja, dan tidak mengapa (tiada dosa atau kesempitan).”* (Riwayat Al-Bukhari dan Muslim)

Ibadah haji hari ini lebih tersusun dan dikawal dengan lebih rapi dan ketat, kerana jumlah jemaah yang jauh lebih ramai. Kemajuan dimanfaatkan untuk membantu jemaah haji melaksanakan ibadah dengan lebih selamat dan teratur. Namun perubahan ini pastinya tidak mengubah hakikat ibadah haji itu sendiri.

Begitu juga dalam banyak ibadat lain, termasuk ibadah korban. Jika dahulunya ia dilakukan dan diagihkan di kalangan masyarakat setempat, namun pada hari ini, ia turut dilaksanakan di pelbagai tempat di merata dunia bagi mengutamakan golongan yang lebih memerlukan, sekaligus memenuhi roh ibadah korban untuk membantu mereka yang berada dalam kesempitan hidup.

Penyesuaian yang diperlukan dalam menterjemahkan ajaran agama dalam kehidupan seharian adalah sebahagian dari **syariat** Islam itu sendiri. Bahkan, para ulama telah mengingatkan, bahawa hukum bagi sesuatu keadaan tidak boleh bersandarkan karangan dan penulisan dalam kitab yang terputus dari situasi sebenar kehidupan.

Bayangkan – jika **syariat** hanya terikat pada satu bentuk pelaksanaan yang jumud dan sempit, pasti manusia akan berhadapan dengan kesukaran dalam melaksanakan ketaatan

dan menzahirkan ketakwaan dalam situasi yang berbeza-beza. Sedangkan Allah s.w.t. mengetahui bahawa zaman dan keadaan akan terus berubah, manakala cabaran yang dihadapi manusia akan berbeza-beza.

Maka **syariat** Islam datang dengan keluasan yang membolehkan ibadah terus mekar dalam pelbagai keadaan.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ  
اللَّهُ أَكْبَرُ وَلِلَّهِ الْحَمْدُ

### **Sidang jemaah yang dirahmati Allah,**

Di sinilah kita dapati manusia sering terjebak antara dua pelampauan.

Ada yang bersikap **ifrat**, iaitu terlalu jumud dan kaku sehingga menolak sebarang bentuk **penyesuaian**, seolah-olah agama tidak memberi ruang kepada perubahan keadaan. Ia berfikiran sempit sehingga membataskan dan mengecilkan ruang yang asalnya luas dalam **syariat**.

Dan ada pula yang bersikap **tafrit**, iaitu meremehkan hukum-hukum agama sehingga mengabaikan **prinsip-prinsip** dan hukum-hukum jelas yang telah ditetapkan oleh Allah s.w.t. Ia mencari alasan tanpa sandaran kukuh untuk menghalalkan apa yang jelas haram, hanya kerana ingin mengikut hawa nafsunya.

Sedangkan yang dipilih dan dianjurkan agama adalah jalan pertengahan. Firman Allah dalam Surah Al-Baqarah ayat 143:

وَكَذَلِكَ جَعَلْنَاكُمْ أُمَّةً وَسَطًا لِتَكُونُوا شُهَدَاءَ عَلَى النَّاسِ  
وَيَكُونَ الرَّسُولُ عَلَيْكُمْ شَهِيدًا

Yang bermaksud: *“Dan demikianlah Kami jadikan kamu umat yang **seimbang**, agar kamu menjadi saksi bagi umat manusia, dan agar rasul (Muhammad) menjadi saksi atas (perbuatan) kamu...”*

Jalan pertengahan ini, atau “Wasatiah” bukan menggadaikan **prinsip** agama. “Wasatiah” itulah antara prinsip agama. Ia adalah keseimbangan yang lahir daripada kefahaman yang mendalam terhadap kesempurnaan **syariat** ini, bahawa ia teguh pada **prinsip**, tetapi luas dalam pelaksanaan.

### **Sidang jemaah sekalian,**

Keseimbangan ini dapat dilihat dalam kehidupan seorang Muslim yang memahami agamanya dengan baik. Ia tidak menjadikan agama sebagai beban, dan tidak pula menjadikannya ringan tanpa **prinsip** dan panduan. Sebaliknya, ia menjadikan agama sebagai cahaya yang membimbing langkah dalam menghadapi perubahan zaman.

Allah s.w.t. mengajar kita keseimbangan dalam kehidupan – dalam ibadah, dalam perbelanjaan, dalam urusan makanan

halal dan haram, dan dalam seluruh urusan hidup – agar kita tidak terjatuh ke dalam pelampauan.

Atas dasar kefahaman ini, Aidiladha mengajar kita makna pengorbanan yang lebih luas. Ia bukan sekadar menyembelih haiwan korban, tetapi juga kesediaan untuk tunduk kepada petunjuk Allah s.w.t., meskipun ia memerlukan kita **menyesuaikan** diri dengan keadaan, tanpa mengorbankan **prinsip**.

Maka terdapat tiga pengajaran besar yang perlu kita hayati.

**Pertama: Memperdalam ilmu agama dengan kefahaman yang menyeluruh**

Ilmu bukan sekadar mengetahui hukum halal dan haram, tetapi memahami tujuan dan hikmah di sebalik sesuatu hukum. Kita perlu beralih daripada semata-mata bertanya, *“Boleh atau tidak boleh?”*, kepada soalan yang lebih meluas dan mendalam: *“Apakah tujuan dan matlamat (atau maqasid) di sebalik ajaran ini?”*, *“Apakah nilai yang ingin dicapai, dan bagaimana dapat ia diamalkan dalam realiti kehidupan tanpa melanggar nas yang jelas?”* *“Apakah pertimbangan yang perlu diambil dalam menilai sesuatu keadaan dan situasi?”*

**Kedua: Meyakini bahawa penyesuaian yang berasaskan ilmu adalah sebahagian daripada keindahan syariat**

**Penyesuaian** bukan kelemahan agama, tetapi tanda keluasan rahmat Allah s.w.t. Umat yang memahami ini akan menjadi umat yang lebih yakin, lebih tenang, dan lebih anjal menghadapi cabaran zaman.

### **Ketiga: Memperluas makna pengorbanan kepada sumbangan buat umat manusia**

Umat Islam tidak hidup untuk dirinya sendiri. Pengorbanan kita hari ini melepasi batasan peribadi kepada insan sekeliling, dan seluruh umat manusia. Dalam dunia yang berdepan dengan pelbagai cabaran seperti perubahan iklim, ketegangan sosial dan salah faham terhadap Islam, umat Islam perlu tampil sebagai sumber rahmat, hikmah dan penyelesaian.

### **Sidang jemaah yang dirahmati Allah,**

Aidiladha ini mengingatkan kita bahawa Islam adalah agama yang sempurna dalam **prinsipnya**, luas dalam rahmatnya dan seimbang dalam pendekatannya.

Maka marilah kita menjadi umat yang berilmu dalam memahami agama serta yakin dalam mengamalkannya. Semoga Allah s.w.t. menjadikan kita umat yang teguh imannya, benar kefahamannya dan indah akhlaknya dalam menzahirkan Islam sebagai rahmat bagi seluruh alam. Amin ya Rabbal 'Alamin.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ

اللَّهُ أَكْبَرُ وَلِلَّهِ الْحَمْدُ

أَقُولُ قَوْلِي هَذَا وَ أَسْتَغْفِرُ اللَّهَ الْعَظِيمَ لِي وَ لَكُمْ، فَاسْتَغْفِرُوهُ إِنَّهُ هُوَ الْغَفُورُ

الرَّحِيمُ

## Khutbah Kedua

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ،

اللَّهُ أَكْبَرُ، اللَّهُ أَكْبَرُ،

اللَّهُ أَكْبَرُ، اللَّهُ أَكْبَرُ

الْحَمْدُ لِلَّهِ حَمْدًا كَثِيرًا كَمَا أَمَرَ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى فِيمَا أَمَرَ، وَانْتَهُوا عَمَّا نَهَاكُمْ عَنْهُ وَزَجَرَ.

أَلَا صَلُّوا وَسَلِّمُوا عَلَى النَّبِيِّ الْمُصْطَفَى، فَقَدْ أَمَرَنَا اللَّهُ بِذَلِكَ حَيْثُ قَالَ فِي كِتَابِهِ الْعَزِيزِ: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ صَلِّ وَسَلِّمْ وَ بَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمُهَدِّينَ سَادَاتِنَا أَبِي بَكْرٍ وَعُمَرَ وَعُثْمَانَ وَعَلِيٍّ، وَعَنْ بَقِيَّةِ الصَّحَابَةِ وَالْقَرَابَةِ وَالتَّابِعِينَ، وَتَابِعِي التَّابِعِينَ، وَعَنْ مَعَهُمْ وَفِيهِمْ بِرَحْمَتِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ  
وَالْأَمْوَاتِ. اللَّهُمَّ ادْفَعْ عَنَّا الْبَلَاءَ وَالْوَبَاءَ وَالزَّلَازِلَ وَالْمِحْنَ، مَا ظَهَرَ مِنْهَا  
وَمَا بَطَنَ، عَن بَلَدِنَا خَاصَّةً، وَسَائِرِ الْبُلْدَانِ عَامَّةً، يَا رَبَّ الْعَالَمِينَ.

اللَّهُمَّ إِنَّا نَسْتُوْدِعُكَ أَنْفُسَنَا وَأَهْلَنَا وَبِلَادَنَا، وَنَعُوذُ بِكَ مِنْ شُرُورِ  
الْمُفْسِدِينَ، وَكَيْدِ الْمُعْتَدِينَ، وَظُلْمِ الظَّالِمِينَ. اللَّهُمَّ إِنَّا نَجْعَلُكَ فِي نُحُورِهِمْ،  
وَنَعُوذُ بِكَ مِنْ شُرُورِهِمْ. اللَّهُمَّ يَا مُنْزِلَ الْكِتَابِ، وَيَا مُجْرِي السَّحَابِ، وَيَا  
هَازِمَ الْأَحْزَابِ، اهْزِمِ الْأَحْزَابَ، وَأَنْصُرْ إِخْوَانَنَا الْمُسْتَضْعَفِينَ فِي غَزَّةٍ وَفِي  
فِلِسْطِينَ وَفِي كُلِّ مَكَانٍ عَامَّةً، يَا أَرْحَمَ الرَّاحِمِينَ. اللَّهُمَّ بَدِّلْ خَوْفَهُمْ أَمْنًا،  
وَحُزْنَهُمْ فَرَحًا، وَهَمَّهُمْ فَرَجًا، يَا رَبَّ الْعَالَمِينَ. رَبَّنَا آتِنَا فِي الدُّنْيَا حَسَنَةً،  
وَفِي الْآخِرَةِ حَسَنَةً، وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى، وَيَنْهَى عَنِ  
الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ، فَادْكُرُوا اللَّهَ الْعَظِيمَ  
يَذْكُرْكُمْ، وَاشْكُرُوهُ عَلَى نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ  
اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.